

ZAPISNIK S PRVE (KONSTITUIRAJUĆE) SJEDNICE VIJEĆA RODITELJA JU TREĆA GIMNAZIJA - ŠKOLSKA 2024/25. GODINA

Prva sjednica Vijeća roditelja održana je u četvrtak, 3. 10. 2024. god. s početkom u 18.00 sati u školskoj biblioteci.

Uvidom u spisak prisutnih roditelja sastanku prisustvuje 20 članova Vijeća roditelja. Umjesto predstavnice II-4 odjeljenja, gđe. Makside Ibrahimović, prisustvuje zamjenik, g. Rizah Kabaši. Izostanak su najavili predstavnik II-5 odjeljenja, g. Mirza Hulusić, i predstavnica IV-3 odjeljenja, gđa. Ajla Dautbašić. Predstavnica I-1 odjeljenja, gđa. Indira Osmić, nije dobila poziv na sjednicu zbog greške u mail adresi, što je ustanovljeno naknadno. G. Osman Terzić nije prisustvovao sjednici.

Broj prisutnih članova zadovoljava kvorum za odlučivanje.

Sjednici su prisustvovala direktorica, Amra Čolić, zamjenica direktorice, Meliha Salihović, psihologinja, Emina Kasapović, i pedagoginja, Hasija Dedović.

Predložen je sljedeći dnevni red, koji je Vijeću roditelja prethodno dostavljen uz poziv:

1. Konstituiranje Vijeća roditelja JU Treća gimnazija za školsku 2024/25. godinu prema čl. 4 Poslovnika o radu Vijeća roditelja JU Treća gimnazija
2. Upoznavanje sa Poslovníkom o radu Vijeća roditelja JU Treća gimnazija
3. Upoznavanje sa Protokolom komunikacije i saradnje roditelja sa školom JU Treća gimnazija
4. Izvještaj o radu Vijeća roditelja za školsku 2023/24. godinu
5. Izbor rukovodstva Vijeća roditelja JU Treća gimnazija u školskoj 2024/25. godini, prema čl. 7 Poslovnika o radu Vijeća roditelja JU Treća gimnazija
6. Primopredaja dužnosti prema čl. 9 Poslovnika o radu Vijeća roditelja JU Treća gimnazija
7. Upoznavanje roditelja sa Izvještajem o rezultatima uspjeha učenika u učenju i vladanju u školskoj 2023/24. godini
8. Predstavljanje člana u Školskom odboru JU Treća gimnazija iz reda roditelja
9. Informacija o novim pravilnicima koji se primjenjuju od školske 2024/25. godine donesenih od Ministarstva za odgoj i obrazovanje KS
10. Tekuća pitanja:
 - Podrška i doprinos roditelja radu škole - Sporazum o saradnji sa Udruženjem Alumni Treće gimnazije
 - Fotografiranje Vijeća roditelja za objavu na web stranici i „Godišnjaku“

Predloženi dnevni red je jednoglasno usvojen.

Prije početka sjednice izvršeno je zajedničko fotografiranje ovogodišnjeg saziva Vijeća roditelja, kako bi se fotografije koristile za sadržaj „Godišnjaka“ i objavu na web stranici škole.

Ad/1

Sjednicu je otvorila direktorica, gđa. Amra Čolić i zaželjela uspješan rad predstavnicima roditelja u Vijeću roditelja Treće gimnazije. Direktorica je prozvala prisutne roditelje koji su odabrani da u ime svojih odjeljenja budu predstavnici u Vijeću roditelja ove školske godine.

Nakon toga ustanovljeno je da su ispunjeni uvjeti za konstituiranje Vijeća roditelja za školsku 2024/25. godinu, prema čl.4 Poslovnika o radu Vijeća roditelja Treće gimnazije.

Ad/2

Direktorica je prisutne upoznala s postojećim Poslovníkom o radu Vijeća roditelja JU Treća gimnazija, te naglasila da će bit potrebno donijeti novi Poslovník radi usklađivanja sadržaja pojedinih članova Poslovnika s obzirom na to da je usvojen novi Zakon o odgoju i obrazovanju u OŠ i SŠ KS. Direktorica je predložila da se na ovoj sjednici pridržavamo odredbi postojećeg Poslovnika, a da se zatim imenuje Komisija Vijeća roditelja koja bi radila na izmjenama i dopunama Poslovnika, te pripremanja prijedloga i zatim usvajanja na narednoj sjednici. U vezi s tim imenovana je komisija u sastavu: g. Izet Turković, gđa. Aida Aganović i gđa. Amra Pešto u saradnji sa pedagoginjom, Hasijom Dedović.

Ad/3

Direktorica je roditelje upoznala sa internim školskim dokumentom - Protokol komunikacije i saradnje roditelja sa školom, koji je donesen u martu 2023. godine od strane Vijeća roditelja i Nastavničkog vijeća. Protokol je bio prezentiran roditeljima na prvom roditeljskom sastanku, a ovom prilikom direktorica je ukazala na značaj redoslijeda komunikacije sa roditelja sa školom. Direktorica je predložila da se imenuje komisija Vijeća roditelja koja bi radila na izmjenama i dopunama Protokola, radi usklađivanja sa novim Zakonom, te pripremanja prijedloga Protokola i zatim usvajanja na narednoj sjednici. U vezi s tim imenovana je komisija u sastavu: g. Izet Turković, gđa. Aida Aganović i gđa. Amra Pešto, u saradnji sa pedagoginjom, Hasijom Dedović.

Ad/4

Gđa. Aida Aganović, predsjednica Vijeća roditelja u prošloj školskoj godini, prisutnima je ukratko prezentirala Izvještaj o radu Vijeća roditelja iz prethodne školske godine, koji je zatim prihvaćen.

Ad/5

Direktorica, gđa. Amra Čolić, prisutne podsjetila na čl. 7 Poslovnika o radu Vijeća roditelja koji se tiče izbora rukovodstva Vijeća, te pozvala roditelje da iznesu svoje prijedloge za imenovanje rukovodstva Vijeća roditelja za školsku 2024/25. godinu.

Prema prijedlogu nekoliko roditelja koji su bili članovi Vijeća prošle šk. god. odabrano je rukovodstvo u sastavu: gđa. Aida Aganović - predsjednica, g. Tihomir Veselinović - zamjenik predsjednika i g. Izet Turković - sekretar. Odluka je donesena jednoglasno. Članovi rukovodstva su se zahvalili na ukazanom povjerenju i izrazili nadu da će kvalitetno sarđivati i raditi u interesu škole i njihove djece.

Ad/6

Pedagog je prije sjednice pripremila Zapisnik o primopredaji dužnosti, prema čl. 9 Poslovnika o radu Vijeća roditelja. S obzirom na to da je rukovodstvo ostalo isto nije bilo potreba za primopredajom dužnosti i dokumentacije. Pedagog je napomenula da se kompletna dokumentacija Vijeća roditelja iz prethodnih školskih godina nalazi i čuva u školskoj arhivi u kancelariji stručne službe.

Ad/7

Zamjenica direktorice je prisutne upozнала sa Izvještajem o rezultatima učenika u učenju, vladanju i izostancima u školskoj 2023/24. godini. Izvještaj je poslan roditeljima putem e-maila.

Ad/8

Predstavnik roditelja u Školskom odboru, g. Muhamed Kučuk, je najvio odsustvo, te je direktorica prisutne obavijestila o tome, uz napomenu da će prisustvovati sljedećoj sjednici Vijeća roditelja radi predstavljanja i upoznavanja.

Ad/9

Pedagoginja je informirala prisutne o nekoliko novih pravilnika koji se primjenjuju u srednjim školama od 1. 9. 2024. god. Radi se o sljedećim pravilnicima:

- Pravilnik o provođenju mjera odgojno - obrazovne podrške i stručnog tretmana učenika
- Pravilnik o izricanju odgojno - disciplinskih mjera u osnovnim i srednjim školama
- Pravilnik o vođenju evidencije o neprihvatljivim oblicima ponašanja i / ili drugim faktorima koji mogu ugroziti najbolji interes i zaštititi učenika

Roditelji su prethodno bili upoznati sa ovim sadržajima na roditeljskim sastancima koje su realizirali razrednici prema uputama od školske stručne službe. Roditelji su upućeni da se pravilnici nalaze na web stranici škole. Direktorica je naglasila da je važno da se pridržavamo pravilnika, ali da mogu biti sigurni da ćemo sve raditi u interesu njihove djece i da ćemo blagovremeno kontaktirati roditelje, informirati o svim radnjama koje budemo poduzimali u skladu sa propisanim procedurama iz pravilnika, te pozvala roditelje da sarađuju sa školom s ciljem zaštite i dobrobiti njihove djece.

Pedagoginja je dala informaciju o predstojećoj radionici za roditelje na temu Porodično nasilje - prevencija i posljedice koja će se održati 17. 10. 2024. u 18. 00 sati u amfiteatru. Radionicu će održati psihoterapeutkinja, gđa. Arijana Čatović iz Fondacije lokalne demokratije. Roditelji su zamoljeni da prenesu ovu informaciju i pozovu zainteresirane roditelje da se prijave putem maila pedagoginji.

Pedagoginja je zatim dala kratak osvrt na Pravilnik o ishrani u predškolskim ustanovama, osnovnim i srednjim školama KS, te informirala o tome da se u školi više ne može prodavati „nezdrava hrana“ i da je tačno predviđeno koja hrana je dozvoljena za ponudu i prodaju u školama. Zbog toga je trenutno u školskoj kantini ponuda proizvoda izmjenjena, i hrana je zbog toga poskupjela. Direktorica je istakla da je bio upitan rad školske kantine, da su aparati sa grickalicama i slatkišima morali biti uklonjeni, ali da smo uspjeli dogovoriti sa firmom „Slatko i slano“ da kantina bude otvorena sa prilagođenom ponudom proizvoda, jer je to mjesto gdje se učenici rado okupljaju i druže.

U vezi s tim otvorila se diskusija i roditelji su se složili da se obrate Ministarstvu s upitom o izmjeni pravilnika, odnosno izuzimanja srednjih škola iz Pravilnika o ishrani. Dogovoreno je

da će se gđa. Indira Čečo - Hidić i gđa. Darija Ramljak u ime Vijeća roditelja obratiti Ministarstvu.

Nakon toga, direktorica je prisutnima spomenula da je došlo i do izmjena u Pravilniku o realizaciji škole u prirodi, izleta, studijskih posjeta, ekskruzija, kampovanja/logorovanja, društveno-korisnog učenja i drugih oblika odg. - obraz. rada u OŠ i SŠ. Ona je naglasila da određeni članovi Pravilnika tretiraju pitanja načina putovanja, odnosno zabrane noćnih putovanja, koja su ranije bili dozvoljeni. U vezi s tim, direktorica je navela da nam to predstavlja problem na predstojećoj ekskurziji III razreda i da će se to reflektirati na ukupnu cijenu ekskurzije. Predstavnicima roditelja III razreda izrazili su negodovanje zbog toga, te predložili da se obrate Ministarstvu za odgoj i obrazovanje KS zahtjevom za izmjenu tog člana Pravilnika. Direktorica je zatim, istakla da ima informaciju da će biti jedna zajednička inicijativa prema Minsitarstvu po tom pitanju, te je dogovoreno da će se kao direktor Škole priključiti ovoj inicijativi uz podršku koju su joj na sjednici dali predstavnici roditelja III razreda.

Ad/10

Gđa. Darija Ramljak je imala pitanje u vezi prava roditelja da opravda dva dana po polugodištu, te istakla da je to malo s obzirom na to koliko su velike gužve kod porodičnih ljekara. Pedagog je dala pojašnjenje da kao škola ne možemo to mijenjati jer je tako propsano pravilnikom. Gđa. Ramljak je navela da bi se ona po tom pitanju obratila Ministarstvu, što su ostali roditelji podržali.

Presjednica Vijeća gđa. Aida Aganović se obratila roditeljima i informirala / podsjetila roditelje o potpisanom Sporazumu o saradnji Vijeća roditelja sa Udruženjem Alumni Treće gimnazije, koji je donsen prošle godine početkom novembra. Sporazumom se predviđa mogućnost doniranja novčanih sredstava za školske projekte na račun Udruženja, odnosno podračun kreiran za sredstva školi. Prisutne je upoznala s tim da se ukazala potreba za doniranjem novčanih sredstava, kada je odlukom Ministarstva ukinuta *participacija roditelja u minimalnim učeničkim troškovima školovanja*, što se negativno reflektirao na prihode škole za realiziranje vannastavnih aktivnosti učenika (školski projekti, izleti / posjete, pripreme i odlasci učenika na takmičenja, školske manifestacije i sl.) Predsjednica je naglasila da je se radi isključivo o dobrovoljnim donacijama roditelja i da novčani iznos nije određen. Prisutni su pozvani da sa ovim upoznaju / informiraju roditelje svojih odjeljenja. Sporazum o saradnji će biti poslan roditeljima putem maila, a nakon toga i primjerak uplatnice.

Na prijedlog roditelja dogovoreno je da se uradi novi promotivni video škole, koji bi bio predstavljen svim roditeljima, a kako bi uvidjeli koliko aktivnosti se provodi u našoj školi koje svakako uslovljavaju i traže određena materijalna / novčana sredstva.

Dogovoreno je i to da će se uz podršku roditelja uraditi novi promotivni video za školu, a da će to uraditi učenici uz podršku g. Rizaha Kabašija i da će mu u tome pomoći g. Tihomir Veselinović koji je i do sada radio na unapređenju školske web stranice.

Direktorica je prisutne upoznala da ove godine imamo u I razred upisane učenike s poteškoćama u razvoju, za koje planiramo opremiti kutak za odmor i druženje, te bismo dio novčanih sredstava iz donacija namjenili tome, što su svi roditelji podržali.

Gđa. Elma Karahodžić Hamza se obratila s pitanjem o nastavnom planu i programu za izbornu područje informacionih tehnologija i prenijela zabrinutost pojedinih roditelja II-2 odjeljenja zbog toga što nemaju u III i IV razredu predmet fiziku. Istakla je da to nisu svi roditelji ni znali, niti obratili pažnju prethodno kada je bila u toku reforma kurikuluma. Direktorica je potvrdila da neće imati fiziku, ali da imaju dosta stručnih predmeta, što je važno za razvoj IT karijere. Dogovoreno je da bi mogli naredne šk. god. zainteresiranim učenicima dati mogućnost praćenja nastave fizike fakultativno.

Prva sjednica Vijeća roditelja završena je u 19.20 sati.

Zapisnik sastavila pedagoginja, Hasija Dedović

Hasija Dedović

Zapisnik ovjerila predsjednica, Aida Aganović

Aida Aganović